



JULE  
GOIKOETXEA

---

tractatus

# Tractatus

JULE GOIKOETXEA

 **Susa** poesia

Liburu honen salneurria: 3 € + BEZ.  
Ordainketa egiteko, edo liburu gehiago eskuratzeko:

<http://susa-literatura.com/ebook>

© 2014 Jule Goikoetxea

© edizio honena: Susa

cc-by-sa Creative Commons Aitortu Partekatu

<http://creativecommons.org/licenses/by-sa/3.0/deed.eu>

Lehen edizioa paperean: 2014ko maiatza

Edizio hau: 2014ko maiatza

Susa: 317 posta kutxa / 20800 Zarautz

Adoain Aita 92 / 31015 Iruñea

Zubitalde 21 / 48195 Larrabetzu

Telefona: 943 83 26 55

Elektroposta: [susalit@armiarma.com](mailto:susalit@armiarma.com)

Webgunea: <http://susa-literatura.com>

*Tomas Goikoetxeari*

*ezizenez Flanagan*

*Gaurhuts*

*Fermin Gorraitz*

*Carlota*

*Garikoitz*

*Makalulu...*

*Triniren semea*

---

# ALBAIT ZORIONTSUENA

**a**lbait zoriontsuena  
izan zaitez gaur  
bihar berriro  
gaur izango baita

eta lehen aldian zoriontsua  
izaten jakin ez bazenuen  
espiritualki miserablea  
egingo zaizu eternitatea

baina gaur zoriontsua  
izan baldin bazara  
a! orduan...  
orduan eternitatea egingo zaizu  
espiritualki aspergarria

# **TRACTATUS CIVICUS**

---

# TRACTATUS CIVICUS

hazitakoan  
zibilizazioaren plazer  
diskurtsibo patologikoan barrena  
galdu naiz  
eta txikitan gidatzen ninduen  
mutiko basatiaren idearioa  
suntsitu egin da

gaizki atera den neskatxa baten  
posterretratua daukat ordezko  
susmagarriki  
komen eta perpaus  
subordinatuen  
ezer laburtzen ez duen  
laburdura motz honen  
menpe

hitzak

munizioa  
barreiatzen du

emozionalki  
menpekotasuna  
samurtu eta  
ziurtagiriz  
bizirauteko

honezkero  
nire senetik atera naiteke  
oligarkikoki  
inperio alemanaren  
europar onespeneekin  
nire obedientzia akreditatu dute  
orain Lady naiz

Sir-en emazte

egiarenean ostatu hartuta  
boterearen  
plazer diskurtsibo patologikoan  
egoitzaduna

honezkero  
erail dezaket  
zibikoki  
hots  
emozionalki



boterearen  
egiaren  
eta hitzaren  
menpe

---

# HUMANITATEA

Zuzen  
zentsugabekeriaren gainean  
tente  
ibiltzeko sofistikazio hori

---

# POESIA

Debekatua daukagun  
garen guztia  
sartzen dugun lekua  
da poesia.

Signifikantearen erritmoa  
bere ondare antizapaltzaileaz  
da poesia.

---

# GLORIA

**E**z zintuen inork  
Demokritorekin nahastu  
baina susmoa zegoen  
ez ote zenuen bizitza luze  
eta ankerra izango

oso  
oso urtetsu  
hilko zinen  
Olinpo prekario batean

besterik ezean  
gazte hiltzea  
hautatu zenuen  
gazte  
eta glorian

sablez  
porrotez  
eta konspirazioz  
lehorte hordiz  
eta tolerantzia arriskutsuz  
beteriko glorian

Sokratesen gisara  
bizi izan zinen  
zirikatzeari utzi gabe  
Eoloren antzera  
zaticatua  
desagertu zara  
itsasoaren babesera

zure azken hatsean  
ducados batekin  
bedeinkatu duzu Marx  
eta hortxe utzi duzu Hegel  
gorputza trokaturik  
eta sozialistak zorabioan  
aulki baten inguruan  
jira-biran

Zinikoekin bizi  
atua  
anaidea  
ez dirurik ez lotsarik  
Feboren moduan  
portatu zinen  
bizirauteagatik

Diskordia bezala  
identitateagatik

baina aspaldi du dakigula  
Oteizarena  
Benitoren  
eta KGBrena zarela

demokraziaren  
eta  
klandestinitatearen  
gerra hotzarena

sablez  
bizitzaz  
eta konspirazioz  
lehorte hordiz

eta tolerantzia arriskutsuz  
beteriko glorian

---

# HEREDATU NUEN

**B**erandu agurtu ninduzun  
arratsalde despistatu hartan  
goiztiar jaio bainintzen  
horrela zioen agenda  
besapean:

«Hiru urterekin kaskoa eskuratu  
altzairuzko batea zazpirekin  
armarri osoa hamahirurekin.  
Eta hiltzera!»

Orain  
zure gorputzaren  
hutsaldi jasanezina  
nirean egokitu da  
bizitzera  
    gesalbegiz

ziurtasuna  
giharrak estutzen  
pasioa deritzan lurralderik gabeko



zauri alderrai honen  
oroimen bortitzean.

Zu zenduta  
nigan bertakotuko da pasioa  
mundua ohartu arte  
hemen barrena ibili zela  
elkarrekin idatzi genuen  
historia honen uneren batean  
penarik  
kulparik gabe  
heredatu nuen  
heresia alai

kiebra  
heredatu nuen  
diziplina

ohitura  
heredatu nuen  
inkisizioa  
desafiatzeko  
ahaleginean lehertu gabe  
xuxurlatzen zenidan egunero

ikastolara eramaten ninduzunean  
zure betiberanduan  
nik, graziaz eta ostia ozpinduz betea,  
heredatu ez nuena.

Bizia heredatu nuen  
kostaz osatua  
minez eta erresistentziaz gainez egindako  
baretasuna

umiliazioa fabrikatik dator  
gizartean  
horregatik hitz egiten genuen  
instititutik bueltan  
errespetuaz eta ekonomiaz  
ekonomiaz eta politikaz.  
Gipuzkoarra zen ogasuna  
bilbotarra speeda.

Begitan dut  
ziurtasuna  
giharrak estutu eta  
dardaratzen dituen hori,  
pasioa deritzan

lurralderik gabeko  
denbora alderrai honetatik eraitsitako  
hauskortasunaren oroimen iraunkorrean.

Zu zenduta  
nirean bertakotuko da pasioa  
antzematen duen arte munduak  
hemen barrena ibili zela dantzan  
elkarrekin idatzi genuen  
historia honen uneren batean  
gauero  
Gordon's bakoitzeko  
zure partzialitate alprojarekin nik,  
graziaz betea,  
heredatu nuena.

---

# GAU

Ilbegi  
utz iezadazu  
geldoki  
egiazta zaitzadan  
unearekin dantzan

mugimenduen elkarrizketan  
taupada hezurtuen saldoan  
gorputz estasiatuek  
argumenturik gabeko  
egoeretarako  
konposatzen dituzten  
eremu estrategietan.

Adibide oparo gisa hasiko gara  
herio kosmogoniko bakun amaituko  
Epikuro eta bere ataraxiekin  
benetako emagaldu  
    nota bakoitzean laskituak  
    teknikoki lizunduak  
gure jainko eta gure fededunen aurrean

eternitate guztirako ja  
aske.

Ilbegi  
utz iezadazu  
baiezta zaitzadan  
abstrakzio eta  
azpikeriazko dantzan  
taupada hezurtuen  
eta gorputz sorginduen  
samaldan.

---

# EXISTENTZIARIK EZA

basamortuzkoa

harea

harria

milurtekoak

arnasten

bakeak zikindua

itsasoaren hatsa biriketan

sekula abiatu ez delako

inoiz bueltatzen ez den

ordena bakarti honen

arorik gabeko

espazioak itoa

ezerezean ere

ohartezina

hilik

zoriontsu

basamortu

---

# BALDINTZABIKOIA

*Wanted, Dead or Alive*

dut izana

izateko inoiz

baimenik ukan behar ez duena

baldintzabikotik

hanka egin zuen

izututa

baldin eta soilik baldin

poliespan piztiak,

orduan

herritartasuna.

---

# EZER EZ DA SOBERAN

Zure esku artean hingatutako  
erritmo horrek esnatu nau  
laba samurreko korronte leunen  
sumendi vesubioar bat biribilduz  
iskanbila kartsuzko  
ezpain danbatuak  
    auhenen metrika oparoarekin  
    harmonizatzeko duten  
    gaitasuna dela medio  
    ezagunak

azti zaldunek  
su aratzez galdatuz  
nire ipurmasailak zure  
musura  
    laba samurren gordailua  
    itsas-lurrin zuztarren  
    hezetasun etxekoia

ezer ez da soberan  
ermami erregarri horien



swingean  
hatz rizomatikoen  
berariazko balada errotuak  
sustraituta nire izterretan  
    ongia hutsaltasunean urtzeko duten  
    gaitasuna dela medio  
    ezagunak

ezer ez da soberan  
metrika sukoien  
ezpain danbatuetan  
auhenen iskanbila  
kartsuan

ezer ez da soberan  
fusa bat ere ez  
zure eskuek  
sutzeko duten eran

---

# ITSASALDI

Esne-malkoekin  
harea mugiezinaren  
ertz goiena  
ohartarazten du

ezaxolaz marruskatzen ditu  
etendako bizitza horren dikeak  
zaindari jabal  
azaleratzen ditu eskuak  
fresko paleolitikoan zehar  
neurri osoan  
esploratzeko  
gaztaina koloreko ezpain fosilak  
    mingaina pausatuz  
    une batez  
    kantauri erritmoz  
etendako profila beheratu  
gerora itzuli  
besarkatu eta  
haitzak  
porotsuki

zanpatzeko  
bere tul gris  
eta bere olatu  
gazien brodatuez  
eraisten da dotore  
herri txiki  
eta kosta handi  
honetako  
ozeanoa

kantauri erritmoz  
beti dantzan  
zink gailurrek  
kulunkaturik  
duna beltz  
eta tanta alargunen  
kantari

---

# MINA

arnastean  
airean marrazten ditudan  
keinu guztiak  
mukosa goseti antzera  
estaliz

zipli-zapla  
bere nahieran  
nire erraietan

herio gramo bat  
maindire zuri artean  
zarataz eta basatasunez  
okatua  
zeharo  
fina eta ekaiztsua

hauskortasunez  
horren asfixiatua

erritmorik gabeko

krakatutako oinkadaz betea  
kruzero mugiezin batean  
bere berezko bakardadearen bila

horren adeigabea  
horren oztopatua  
existitzeko  
nire gorputzak  
horren desesperatuki  
interbenitua

---

# ZENTZUA

Zure buruaz beste egiten duzunean  
zentzuaren logikak agindu du.

Zure buruaz beste egiten ez duzunean  
biziraupen logikak irabazi du.

Zentzuaren logika nagusi balitz  
humanitatea ez litzateke existituko  
beraz eskerrak  
zor zaizkionak baino ez.

---

# HERRITARTASUNA

Lotsagarria da abortu hau  
progresoaren garaian  
baina nahiago dut  
periferian dabilen  
duintasunarekin konpondu  
eta galdutzat eman  
nire integrazioa  
modernitatean

---

# BEGIRADA ODOLUSTEN ARI ZAIZU

İltze gori bat  
Rene D'Aubry erritmoan  
zuregana hurbildu eta  
zure bozkario herrena  
bahitzeko intentzio oro  
mailukatzen

utzi etorkizun itxurak egiteari  
hoztasun kanporakoi  
zure azalarekin nahasia  
burdin sasi *al dentez*  
malko absentez  
hanpatua

begirada odolusten ari zaizu  
zure eguna isiltasunean  
hornitzen

hobe desioa laurdenkatu  
zure keinuen mamigunean



ezerezko bala hura

ekintza gogoangarri hau

bere senetik aterata

balioen besterentze honetan

bere istorioa nola hasi ez dakiena

arima hornitzen dizun

oinazearen hutsaltze hori

izango ote da

nahia pazienteki

irensten dizuna

---

# POTEATZEA

**E**rran nahi baita  
literalki  
taberna batetik bestera  
eztabaidan ari  
zutik edatea.

Halaber izan liteke  
barra batetik bestera  
zutik edaten ari  
barrez limurtzea.

Dena astrapala  
hordi  
ke  
kale  
konnotazio trinkoz.

---

# PROBREZIA

Pobreziak  
izterretan darama plazera  
austeritate trebatu batean bildua irmo,  
irainez eta jarraipenez konposatua  
logikarik gabekoa azalean pilatua  
ugaritasuna eta ergeltasuna ez bezalako  
bakardade  
zorrotz batek populatua.

---

# GURE ARTEAN

## 1

Imajinatu dut  
bahituran utzi zenidala arima  
fidantzan  
gorputza tarratatzen nizun bitartean

gau bakar bat  
    bakarra  
eta gorputz hori  
aske litzateke  
espazioaren laburtasun  
despistatutik  
    hustean dena  
    inbaditzen duena

gau hau  
ipuin hau  
imajinatu dudan  
    trasgresio  
    planifikatuko  
zer hau.

## 2

Literaturarik gabe bizitzen ez dakien  
nire gorputzaren zati hori  
zure sexu istorioekin  
miatzen zenuela  
imajinatu dut

satisfazio aurreikusiaz  
asperturik  
harriduraren iturburura  
itzultzen zela  
zure sena

isildutakoaren  
prekarietate  
sentsualera.

Mutu  
idatzi zaitut  
denetarik egiten.  
Nigan.

Pauso irmoz  
nire begirada erantzten  
eta larregi hausnartzen duen  
nire instintu honetara hurbildurik  
zure ahotsaren ukituarekin  
osorik desarmatzen.

### 3

Oihartzun litzateke zure ahotsa

Spinario

drama aztoratu batean  
ez duzu nahi Laokoonik  
ez Troiako gudurik

ipuin apain honetan  
betirako nahi duzu bizi

nahigabe liriko hau  
zure epika simulatuen artean  
fosilizatu

arriskurik gabe betirako  
nire begiratua  
nire diskurtsoa  
nire prakak  
botoigabetuko dituen  
esku errugabea  
ikusmiratu

plazerez hil nahi duzu  
odolez zikindu gabe.

#### 4

Plazera gorputza da  
gorputza odola  
eta drama

beroaldia  
jolas galdua da zuretzat  
furfuria  
ez dagokio zure bizitzari  
horiek gabe bizitzak  
ez du merezi

gorputz hau

ipuin hau

imajinatu dudan

trasgresio

planifikatuko

zer hau.



**TRACTATUS  
MAGNANIMUS**

---

# TRACTATUS MAGNANIMUS

## 1

**B**iluzik itzuliko nintzateke oihanera.  
Ginkgoen, magnolien eta sekuoien  
adarren artean gidatuko zintuzket biluzik.

Titipuntak igurtziko genituzke nahigabe  
nana gracilisen artetik igarotzean  
eta erdigune sakratuan  
abiatze-erritual bati emango genioke hasiera.

Desberdintasunaren elizkizunari.

Ikertuko genizkioke elkarri  
atzaparrak eta hegalak  
basamorturik ez duten  
eztizko duna horiek zeharkatzean  
izterrekin sortzen duten harremana.

Biluzik itzuli naiz  
halabeharra itsutzeko  
atsedenik ez hartzeko

keinu hori nahi dut  
nire izpiritua dotore  
manipulatuko duen  
keinu basatia

jakin dezan  
haztatu baino lehen  
nola ikertu nire  
beste gorputzak.

## 2

Akuri polit hori,  
ni lerrotuta baizik  
ez naiz existitzen  
eta nire misioa  
kaosa zeharkatzea da

identitatea ezarri eta  
absurdoa biribiltzea,  
zure gisako ugaztunek  
jarrai dezaten  
zentzuan bizi eta eternoki  
egietara jolasten.

Zu norabidetzea  
eta gero galbideratzea da,  
kreatura eder hori,  
nire misioa.

Oreka nahi baduzu  
agonia eta kontraesana  
eman beharko dizkidazu,  
ezer ez emanda  
ezereza itzuliko zaizu  
ezin baitut, kume panpox hori,  
ezin beti posizio bakar  
eta berbera izan.

Ez nator  
zu ehizatzeraz  
zu salbatzeraz

zure mundu begirada  
nire betileen haizeñoaz  
urratzeraz  
nator

nire ezpainak  
une batez eme  
zure bizitzan pausatu  
eta zure burua  
arrotz bihurtzeraz

zure minenetik  
ukitu gabe  
zu besterentzeraz

zu  
bereizteraz  
nator.

---

# FAMILIARTEAN

**B**iolentziaren  
ordena sinbolikoa  
aita da.

Amaren  
ordena sinbolikoa  
biolentzia da.

---

# SATURRARAN

«Call me Sandy», mutilak  
orekari eutsi nahian.

«Yeah, well», neskak ezaxolaz,  
harkaitz artean plastaka  
makurtu da  
ikusmiratuz karramarroak  
olatuetatik eta  
bertoko ehiztariengandik  
(«asko dekoguz») ezkutuan.

Haizeak gorputz luzanga eta  
arranditsuak jantzi ditu  
ordenarik gabe harean zabaldutakoak  
lur eragabetua  
bertuteetara jolasean  
itsasoa hankartean  
eta gerritik behera biluzik  
agurtzen du  
eguzkia  
jainkoaren miseriak urtuta  
valsean lerratzen da  
Saturraranen begien aitzinean.

---

# MARRAZKILARIA

Argia beste gramatkarik  
ez duenean  
krokis batekin  
trenkatzen duzu  
bizitza.

Zure presentea  
    mugagabea da  
zure izatea  
    inozentzia landuko  
    zirriborro sutila  
dena zuzen  
harriduraren eta presentziaren  
adierazpeneraino  
lotsagabe doakizu ondotik  
perspektiban begirada  
mediterraneo egunsentiraino

klera pastela bi trazu  
eta ehundura bat  
ez baitzenuen arnasten jakin



herrialde atlantiko oso bat  
borrokan diseinatu barik.

Argia beste gramatikarik  
ez duenean  
krokis batekin  
ulertzen duzu  
bizitza.

---

# PERSPEKTIBA

baliteke  
hobeto maitatzea  
perspektiba aurkitu zenetik  
baina berriro asmatuko nuke  
soilik  
xehetasunez biribiltzeko  
etendako gerra egoeretarako  
joera mundutar hori  
gerra izoztua  
hain intimoa  
maitatzean  
bakarrik  
erailtzen duen  
horietakoa

---

# TERAPIA

inork ez zuen esan  
diskurtsoak  
bizitza  
leku atsegingarria  
bilakatuko zuenik

baina ez naiz ni  
prestigio eta botere esparruen  
konfederazio ez deklaratu honetatik  
deserriratu bakarra

ostutako mendekua besterik ez den  
justizia honetan giltzapetua  
errekonziliazio terapiaz babestua  
konziliatuak jaioko bagina bezala

ai biolentzia  
zein ederra zaren  
oinazerik gabe

zuzendua izan litekeen

disfuntzio bat behar dute  
estatistikek niregandik  
baina  
bizitzak  
konponbiderik ez  
gizateriak  
sendabiderik ez  
zetzua  
ezin da  
ezerezaren erdian  
eraiki  
absurdoaren erdian  
bakarrik

inork ez zuen esan  
diskurtsoak  
bizitza  
leku atsegingarria  
bilakatuko zuenik

terapiari jakinarazi behar lukete  
baina abestiak dioen moduan  
horren gaizki amaitzekoa zen non  
ezin izan bainuen sekula hasi

---

# HAI EK DIRA

haiek dira  
beherantz bihurritzen  
zango artean burua astintzen  
haiek dira  
kolokaturik  
zorabiatu rik  
zerurantz tenkatzen  
infernu urdinxka hori bortxatzen  
haiek dira  
bularrak estutzen  
gudu tanta adeitsu etan  
arrailak ireki eta  
etena ezagutzen ez duen  
plazer uluz unibertsoa biltzen  
haiek dira  
hutsegiterik gabe  
lizunki dantzatzen  
gerra bat hasi nahian bezala  
berdintasun hutsagatik  
haiek dira  
grinaz armaturik

argi balak  
barreiatzen gozamenaren  
erribera guztietan  
hezetasun eta luxuria zaporez  
taktikaz gotorleku  
izatez deskortxatu  
haiek dira  
zehatzak  
beren ahuldade  
eta sendotasunean  
haiek dira  
apartekoak beren miserian  
haiek dira  
trostan denon orainean

---

# ZURE GATZAREN MALKO BATZUENGATIK

Stalin eta Lenin bitarte laxo  
gailurretik gailurrera  
zamalkatuko nintzateke  
zure ipurmasailetan  
Tajikistan eta Kirgizistan artean

Gobi atzealdeko patioa  
zure estepa arrosa eta  
zure zetazko goi-lautada beltzekin  
konparatua

edadearen  
sakrifizio polarra  
epeltzeko  
kotoi eskarlatazko  
igluak eraikiz  
odolustuko nintzateke  
Siberia osoan barrena

aurre egingo nioke

Mongol armadari  
zure gatzaren  
malko batzuengatik

nire mingainarekin  
zizelkatuko nuke zure tailu osoa  
nire hatzmamiekin zure zerua  
infernua entretenituz  
plazeraren jolas  
errudimentarioarekin

zure gatzaren  
malko batzuengatik  
lehertuko nintzateke  
milioika fruitu kartsutan  
zure existentzia nabarraren  
oinatzak argiztatzeko  
ilargia ezpainekin hurbilduz  
zure lubakiraino

gailurrik ez  
esteparik ez  
arrosarik ez



bakarrik geratzen naiz  
intentzioz  
joeraz  
eta gerraz  
beterik

haizezko igluak  
eguzki izoztuak  
lubakirik gabeak

bakarrik ilargi  
eta leherketa barik

ez armadarik  
ez zerurik  
ez edaderik

bakarrik  
gogoz  
eta  
ingenuitatez  
beterik

---

# INFERNUA

**S**oraioek  
boterearen  
ahalmena  
duten sasoia

---

# AKADEMIA

**M**iseria tinkotzen duzu  
betazala mugitu barik  
bere burua engainatzen dakien  
gelditasun  
distantziakide batekin

aristokrata beldurtia  
hala moduzko jatorria  
existentzia higatua

zertarako nahi duzu  
Hefesto surik gabe  
Atenea Medusarik gabe  
zertarako bere ezinezko ontologia  
bere ahuntz armarrria  
bere latorrizko begi-niniak

zertarako hainbeste utopia  
haustura barik  
horrenbeste erudizio  
ulermen bako

birsortzea kudeatzeko  
zorigaitzeko aditua  
pasioa laidotu eta latorrizko begi-niniak  
puzturik  
errausteko  
zinikoki

zure gorputz izoztu eta  
herdoilduaren ertzetan  
desioaren eta sorkuntzaren ezbeharrera  
zuzenean daraman

ibilbide galarazi horren  
sorburua disimulatuz

---

# HERRIAREN TABERNA

barra batean enkoadraturik  
disolbatzen da arratsaldea  
argi mehe baten pean  
elkarrizketa merkez  
trago koma irri artean

burutazio hordiek  
eskasiaren sen on batez  
mugitu gabe saihesten dituzte  
absurdoa luxua eta arrazoia

asmo pildatsuek laguntzen dute  
arretarik ezean hazitako desioa  
baina haur eszena hutsalez  
eta ardi aroko etorkizunaz  
gizendutako orainaldi honi kateatua da  
obrero eta exiliatuarena den  
gehiengoaren bizitza

---

# KONTRABANDOZKO ATRAKZIOA

Larruazal honen egarri  
erbesteratzen duzu eskua  
ekintasunez ihes egiten badizu ere  
begiradak larru gorritan  
bozaten mingaina  
nire ahoaren behartsu  
    eztia  
zure ezpainenatik  
    atergabe  
    labaintzen.

Ahalke tantak  
banan-banan haztatu  
larru lodiz hozitu  
klandestino nirean  
ni zure izerdi bihurtu arte  
larrua findu.

Gurean dena  
larruz

kobratzen da

ukitu

totemikoa

jokoz kanpoko

ukitua

zure koldartasunari botoitua

jakin

ez dakiela

nola zezendu

zure legeei men egiten ez dien

kontrabandozko atrakzioa.

---

# ZORRORATUAK

Gorputz zorroratuak  
lur eme galduan

eskuak prest  
zorrotik at  
berezko begirada  
sexu  
eta ahoarekin  
desiratuak

ez indize klinikorik  
ez antropologikorik

misogino Adamtarrak,  
ez duzue sekula jakingo  
nor garen,  
Jaun Jakitunak

zuen zientziak  
signifikatzen  
uzten ez gaituelako



zuen humanismoak  
mingaina  
sexua  
begirada  
erauzi dizkigulako

baina badugu oraindik bizia  
desioa  
armak  
(eta humanismo apurrik ez)  
zorrotik ateratzeko

---

# EGIA

hain pobrea da  
inork ez du nahi  
eta horren garesti saltzen da  
berak ere haizu ez

---

# IZERDI MALKOAK

**K**rudeltasunetik hanka  
egin nahi zenuen  
ur birziklatuz betetako  
izpiritu kaskar horrek  
nire lehen gizateriaren  
eta oker ondratuenen  
lapur

espoliazio eta akumulazioaren  
malko galduak kurritzeari  
utzi nahi zenion

malko urdanga eta zuhurretan  
kontsolatu nahi zenuen  
ziurtasun

bertute  
malkoetan  
barrezko senezko  
eta biziozkoetan

baina ezin duzu ihes egin

izpiritu akastu

izerdi malkoetatik

    mundua hornitu eta

    ukitu soilarekin

        (Marx)

krudeltasuna

gizatar

gizatarregia

        (Nietzsche)

bihurtzen dutenetatik

---

# GITARRA ANDRAZKOTUAK

tarte semantiko bat besterik ez zara  
ilusiozko eta ile kizkurreko eskeleto semiotikoa  
abstinentziaz eta neurrigabekeriaz konposatua

utz iezadazu istant amaigabe bat bizitzen  
kantu flamenko eta gitarra andrazkotuen  
melodia andaluz donostiar lasartear honetan  
zure bekain beltz eta errima zoroen artean

utz iezadazu zure tristura gorrian dantzatzen  
astrapala gorritz sukartzen  
eztanda egin eta berriz nare arnastu arte  
ile kizkurrez eta ilusioz ase  
zure ukitze grinatsuak  
nire ego eta nire erregina afroalemaniar  
euskal errepublikar demasien artean

ezin da dirurik eta herrialderik gabe bizi  
baina emango dizut nire arima gorri  
metafora literalez trinko  
nire kizkur semiotikoak  
abstinentziaz eta neurrigabekeriaz konposaturiko  
nire eskeleto adierazlea

---

# SERİOTASUNA

Nire gorrotatzeko ahalmenak  
nire maitatzeko gaitasunarekiko  
proporzionala behar luke  
eta nagusiki biak seriotasunez burutzeak  
arduratu behar ninduke

---

# HAUSTURAK TRADIZIOARI

Ez zaitez nirera etorri  
monotoniaren  
usadio bihozgabearekin

sistema osoak  
dauzkazu oraindik  
deskubritzeko

eta nik, laztana,  
lekua soberan  
bertan galbideratzeko



---

# HOTSA DABIL

**D**iotenez  
Subjektua  
Iragan mendean hil zen  
Jainkoa hil eta  
Justu  
Ehun urtera.

Hotsa dabil  
Subjektua  
Prozesu haragitu dela.

Objekturik gabeko  
Prozesu  
Tolesgabea  
Krudela  
On hutsa  
Eta ergela  
Dena leku eta  
Momentu berean.

Ez dago  
Kontraesanik  
Prozesua baizik  
Objekturik gabeko  
Ni  
Esaten diodan  
Prozesua.

Baina ez dut  
Nik esaten.  
Ahotan  
Da.  
Hotsa  
Dabil.

---

# RAVE

Geltoki okupatua  
dotorea  
Londongo periferia  
umiliatua  
ipar periferia  
Victoriar bridaz  
oinordegabetua  
Hackneyko noblezia  
igo da gaur larruz beztitua  
piercing jakek  
inguratzen dute  
sare analogikoz jantzita  
Camberwell errebaleko  
brigadek trabeskatu  
Europa soinudun eta digitala  
argizatzen duen  
Biltzar Ttipi italiarra  
  
kulunkatzen hasi dira  
Cityaren hego hego-ekialdeko  
bihotz dislokatuak

erritmo onean desmuntatuko dira  
japoniar zoratuena eta  
irlandar mozortuen artean  
denek ezagutzen dute  
irteera txistukatzen duten  
hall itzela  
Venusen jaiotza eta Udaberria  
Drum&Bass  
harrizko hormetan  
sabai obalatuak eta  
komun pribatuak  
zoko guztietan  
argirik gabe inprobisatzen da  
bertan bizitza  
Acid-house  
deep deep house  
dantzatzen dute giza harpek  
gogoaren autobidea  
hamar lerrotxo etenetan banatzen  
zarata King's Crossera iritsia  
dotore eginez agurra  
hirugarren egunean agertuko da  
polizia

---

# KLASE ERTAINA

## 1

frakasorik gabe  
hobeto biziko gara  
glorian baino

klase ertaina  
moderazioa da zure patua  
iruzurraren eta abusuaren  
galtzapeko bitartekotza

klase ezaguna  
sorginen  
langileen  
pobre desklasatuen  
kontura

gatzarena arriskatu zutenak  
atzo itsasoa estaltzen zuen  
eta gaur zure masailetatik labaintzen den  
gatz guztia negarrez

sekula negar egin ez zenuena  
mundura ailegatutakoan  
zurea ez zela  
esan zizutenean

miseria giroan erregina  
besteren ugaritasunen morroi  
familian erretreta alienatu baten alde  
ez degradazioaren  
zarata ezinduari aurre

erretreta atzera egitea da  
atzera egitea umiliazioaren aurrean  
porrota  
nahiz eta frakasorik gabe bizi  
nahiago  
glorian baino

## 2

fisiologia dosi txiki batekin  
zioen batek

izpirituak ez lizuke alde egin izango  
orain ordea  
balio taxologikorik gabeko  
animalia zara zu ere  
idealizatzen duen horietakoa  
zuhurragoa dela bizitza  
baretasun dirudunaren eta  
ironia zintzopensantearen hankartean  
dabil errondan despistatua  
agoniaren parabola  
ustekeriaz eta ignorantziaz mozkortua,  
gehiago daki zure gorputzak  
zure bertuteek zure paradigmek baino  
bere helburu bakarra  
orain ehunka milaka urte  
plazer partikularra lortzea du  
ez moral unibertsala  
hau lotsa  
hau nahigabea

baina emadazue kapitala  
eta generikoa bilakatuko dut mundua  
oihana eraikiko dut urre koniferez  
brontzezko lur emankorrez

eta metanol gardeneko errekez  
titaniozko basabideetan barrena kurritzen  
kautxuzko zerua eta kola izarrak eusten

piztia hori,  
marmolezkoa egingo zaitut  
isiltasun akriliko eta  
soraiotasun ekitatibo batekin

### 3

eztanda,  
zatoz nirera  
zuregatik emango dut bizi osoa  
zuregatik salduko dut nire klasea  
ertainen klasea  
borondatez salbuetsitako  
beldurrez okatutako  
konformidadeagatik  
bakea trapitxeatu baino



**TRACTATUS  
INNAVIGABILIS**

---

# TRACTATUS INNAVIGABILIS

Koito egunean  
utziko diogu  
maitaleak izateari

oztopatutako ohitura zahar baten  
mendeku  
su geldoan munduratua

desioa

erreka elbarri  
ari da zabaltzen  
ardo beltzez errez  
zure esamoldeak  
nire kaolin titi artean  
bakarrik  
nabigagarri

desioa

olio suz  
markatua  
birundan  
delirioz janzten gaituen  
buztin

ez naiz ni  
bideraezina da  
nigan haragitua

bizitzeak  
desioaren  
babesleku garden  
bilakatzen nau

bizitzeak  
susmagarri egiten nau

su fineko  
ziriz hesitua  
bideraezin

ez zait letrazko  
esaldi bat bera ere

geratzen

dena da magma

heze

dena da masa

ilun

aurpegirik gabeko

biluztasunak

munduratua

beti puru

eta susmagarri

errepikapen

haragitu den izar

beltz baten antzera

nire kaolin titi artean

bakarrik

nabigagarri

ez hauturik

ez bereizketarik

dena da purutasun

desioa

ez naiz ni  
aditzondoan  
simulazio  
sutsu hau

irmoki  
kikilduki

bestea  
aurpegirik gabeko  
biluztasun

bideraezin

koito egunean  
maitaleak izateari  
utziko diogu

desioa

dena da magma

heze

dena da masa

beltz

dena

biluztasun nabigagaitz

dena

tarte hori izan ezik

nire mingainak bakarrik

ezagutzen duen

zure mingainaren

tarte hori

---

# ABISATU EZINIK

Isiltasunez alboratzen dut ahotsa  
zu hartzeko hausnar  
dimentsio bideraezinen atari oroitzen zaitut  
hiperkubo batean amestuta  
neurrigabekeriaren etc guztiek eskoltatua  
sekretuan eztabaidan orain  
laxo elkarrizketan  
bukaezina den zigarro baten kea iduri  
    kinka okerra jatorriz  
    badaezpada berritua  
    kemen gorriz  
eta intziri urratu baten laguntzan  
nire erraietan aterpetua,  
hondale arrarotu  
zulotze sadomendekati  
eta hotz izerditu  
herreneko triskantza lau honen  
dimentsio miserableetara  
itzuli nahi ezik.

Ilargi kanpaiak

borborka espazioan  
eta ni zu abisatu ezinik  
nirekin zaudela  
eguzkia gonbidatzeaz ahaztu zen  
egun honi kateatua  
nire begipeetan tolestu da dena  
eta iltzatuak dauzkat malkoak

Lurra den  
ama puta honen  
kirio gatzatu eta  
zarratatuari.



---

# MAITASUNA

Baliteke zuk  
neska gizen  
argal eta beldurti horrek  
lapurtutako gorputz batean  
maitatzen bizitzeko  
trikimailuren bat izatea  
menderatuta maitatzeko  
etsia emandako  
lurralde batean.

Baina  
maitasunak  
zu merezi ote zaituen jakiteko  
askatasuna  
praktikatu beharko duzu  
lehenengo.

Beharbada zuk  
neska alai  
itsusi eta arriskutsu horrek  
trikimailuren bat duzu

mundua zapartatu gabe  
menderakuntza zapartatzeko.

---

# ALFERKERIA

**b**idegabekoa eta berantiarra  
pobre beti eta asebeta  
kalezulo batean sartua  
gorrotoaren eta plazeraren pean  
ahantzura eta mespretxuaren artean

---

# PRAGA

Estatuarik estatua  
zeharkatu dugu beltz  
Europa odolustua  
Karlovo Mosten

formalismo barrokoak  
karrika artean aienatzen dira  
nahastuak lurrazal izoztuan  
          pobrezia alderraiek  
gorputzik gorputz  
menderakuntzatik eta sumisiotik  
alde egin ezinik  
          diraute mendeen gaindi  
katedralak  
eta bere magiaren bere fedearen  
kastitate gotikoa argitu zuten  
bortxa guztiek bezala

urreak ez du dantzatzen  
teilatu mugikorren brontze berdearekin  
behatu baino ez du egiten harrituta

tabernan sartuko bagina bezala  
katedralean barrena

beldurtzeko paratu zakur haien  
tailu zelatarien  
aurrean axolagabe  
herri indezentea  
fedebakoa  
letrez ez dakiena  
soilik torturaz  
korridore likinez  
eta kontrahorma bihurrituez,  
sakratuaren errege-mafiaren  
mezenas horiez.

Sortuaren siniestrotasunenean  
eroso egotera iritsitakoan  
heldzen zara  
erosotasunaren gradurik gorenera,  
diziplina sakratu  
eta militarrek  
egoitza duen hartara.

---

# NEURE BURUA FORMALIZATZEN

Pentsamendua  
eskultura neoklasiko bilakatuz  
azalera perfektuekin  
edukiari egokiturik  
baina berarekin  
serioski endredatu gabe  
arbaso arteko flirt hutsa  
etsipen harmoniatsua  
eta kemen falta  
puntu inbaditzeko sikiera.

---

# BESTE GUZTIA

Ez zara nire burkidea  
zure aurrean zarrastatu  
eta nirekin batera  
zarrastatu ez bazara

izan zaitezke  
nire senidea  
nire orgasmoa  
nire historia unibertsala

izan zaitezke  
identifika ezina  
izan zaitezke  
beste guztia

---

# MUNDUAREN BAGINA BEZALA

Ez bai eta ziurtasun naukazulako  
maite zaitut egunero

paseatzera ateratzean  
zure hatz artean  
arrarotasunaren  
desioaren eta  
sistemaren pitzadurak  
seinalatzean

zaintzen nauzulako  
itxuraz behar baninduzu  
harriduraren eta ezustearen  
arteari atsegin sari  
urte luzetan marratutako artea  
gure harreman bizkor eta  
pausagabea  
zure ipuin genoziden eta  
nire infrakzio poetikoen artean  
sortu ditugun



umore moratuko  
euri beltzeko eta  
arrazoi etenkariko  
mundu gertagaitzetan

zurtuta nahi zaitut  
masailekoa joz  
nire peskizen aureolan  
negarrez barrez  
nire abenturak kantatzean  
eta negarrez lantuz  
inpuđikoki diotsudanean  
osorik naukazula  
zure hitz  
egintza on

          eta maltzurrentzat  
zurekin batera  
bizitza erauzteko  
gupidarik gabe eta beti  
munduarenak bagina bezala

krimen eta esanahi zaitudalako  
maite zaitut egunero

---

# JAINKOTIARRA

Poloniako hotza bezain zapalgarritzko  
begirada zaharra  
profilik gabeko puntu batean finko  
ilusio bako  
bizitza hilkorretik ezer espero gabe  
bizitzen dakiten  
idealek bezalaxe.

Gurpil zabaleko tiraderan  
eskultura gisa  
anderea katonatua  
sendotasun izoztuak inguratua  
metroko tunel baltzitan  
txankak plastikozko poltsetan  
baltsamatuak  
itxi gabeko zamarra bihurria  
Varsoviako matxinadan jantzitako  
txapel iheslariarekin  
konbinatua  
higikortasunaren  
bazter ahaztuetan

zaborrontziko  
ogi kozkor bat miazkatzen du  
aurpegipean asetasun perbertso bat  
ezkutatzen duten begi zahar  
eta pribilegiatuen aurretik  
hiri osoa igarotzen zaion bitartean:  
jainkotiar antzeko patxada  
hain kolpatua  
non apurtezin.

---

# KAUSALISMOA

Justifikaziozko eta  
sumarioko  
espioi hori

atera dezala norbaitek  
gau batez  
paseoan

ibai aldera doan  
atzealdeko  
karrikatik

ez dakit

hutsalkeriaz jipoitu  
giza tontotasuna iltzatu  
eta berriz ere  
kausarik gabe  
aske utzi

---

# DISIDENTZIA

Neurri gabeko neurritasun  
albertxiko batek  
ertzatzen dizkizu masailak  
amodio korapilatsu bat  
diskordiarekin  
konfortaren eta subertsioaren erdigunean  
sosegutik liskarrerako trantsizioan  
bizirautean duzu  
zauritua  
trebea  
borrokaren eta elkartasunaren  
fribolitatean artean.

Ez naiz zure  
baina leunki  
kulunkatzen nauzu  
trasgresioaren  
periferietan.

Orain tradizioa ohitura bihurtu zaizula  
eta desakatoa

zure tragedien erdigunean  
umotu,  
orain inbasioak debekuan  
berandutzen zaizkizula  
ez Boscorik  
ez Danterik  
zortea duzu  
ni zugandu gabe jarraiturik.

Ez naiz zure  
baina haztatzen nauzu  
zure eskuek  
errutina despistatutik  
erauzteko ahaleginean  
daramaten  
mugimendu lehiatuan

intimitate bilakatzen nauzu  
egonkortasun asebate horretan  
zamalkatzean.

Orain adarkadak desberdintasunean  
berandutzen zaizkizula,  
orain zure lotsak

nire aurpegia  
estutu duela

lirainki hots egiten didazu  
itsatsiaren eta  
urratuaren  
trokazko tartean

samurra eta lotsagaldua  
nahi nauzu etxeko  
    sosegutik liskarrerako trantsizioan  
ozarrari diozun  
amodio herabe horretan.

Ez naiz zure  
ez zenuke jakingo  
zer egin  
horrenbeste disidentziarekin.

---

# ERREALITATE

Ízara gozatsuaren ukituez durduzatua  
logura  
niregan katonatua  
etxekotasun plantak eginez  
urte luzeetako harremana  
hogeita hamar eternitate eta ez da zerik  
errealitate  
hegohaize tonuz gaur hezetasunez jaioa  
galdataua  
dena zait erabateko baretasuna

tolesbako haize finaren ostean itzuli zara  
janztura kikildurik gabe  
eguzkia saihestuz  
durunda haragi biziaturako  
itsas honetarantz erakarriz  
zurrumurru boladan datorkit  
zure denborale jolasgarria  
baretasuna heriotzez hilik  
airea estaturik  
utz nazazu pixka batean



susma zaitzadan  
urrunean  
presarik gabe  
elegante  
bizitza osoa dugu  
osatu zaitez  
errealitate

laparen gisa niri josia  
ez galderarik ez homiliarik  
ezin dut arnastu  
musukatu marruskatu barik  
ekintasun gupidagabea  
utz nazazu lanean  
nire hurrengo okerkuntzan

pentsatu dibergente  
nola kontatu neurritz eta egiatasunez  
haizetza filosofikoek inguratuta  
fruta-algoritmorik gabe  
nire eguneroko herio nocturnoa  
hornituko duen planik eta  
gaubeila sostengatuko duen  
urre-aurizko kontsoladore

afrikarrik gabe

beti dantzan zauri etxekoien eta  
herdoildutako tulen artean errealitate  
kako-iltze

hobeto egin nezake  
nire hurrengo errakuntzan  
utziko baninduzu lanean

pentsatu dibergente  
nola azaldu  
oharkabean nire heriotzarekin  
bizitza ezitzen duzunean

berriro jaiotzeko parada barik  
traidorea ni  
bakarki utziko zaitut  
nire dantzarik eta hutsaldirik gabe

ezereztuko zara  
zinez  
istant batean  
ni musukatzeko  
neurrik gabe

malerus ostikoka

badoa zure bizitza

badoa

---

# KAPITALA

Zakurkeria demasa da  
kasurik onenean  
bizitza (hirurogeigarrena)  
dio sudur orrazkera deseginarekin  
beltza ezpainenan  
eta kartoi fineko beste ale bat  
arazoa ez baita  
ez kea ez ogia  
mugikortasuna baino

Barakaldotik Basaurira  
etxean izotz  
tabernan zor  
keinu bakoitzeko kobratzen da  
ez badago dirurik  
ez dago eskua  
mingaina  
esanahia  
lekualdatzerik

hotz  
mugiezina  
soilik

pobrezia besterik  
ekoizten ez duen  
mekanismoa da

kapitala

biolentzia inpartziala  
partziala baino hobea  
izango balitz bezala

hotz mugiezina  
demaseko zakurkeria  
dio ke laino artean,  
non da nire esku  
mingain eta  
esanahien  
balio erantsia?

Izoztua,  
sudur orrazkera deseginarekin.  
Zorpetua,  
beltza ezpainenetan.

---

# EUROPA

Berdinduaren eta  
bereziaren arteko  
erlazio barrokoa  
paseatzen da biluzik  
biolin kontzertuz  
zure garondotik

urkatua  
nahi ezik Mi maiorrean, adagio,  
udaberriak Berlin  
elurtzen duen moduan.

Presentzia hustuen  
huts ordenduen  
idilio nahigabetua

agora erbesteratua  
hitz bakoa

eskuarteko harrotzez  
ehundutako

erdigune ezereztua

Europa

barrenik gabeko  
biolontxelo barrokoa

harien arteko duelu eternala  
zure lepoan

urkatua  
nahi ezik Mi maiorrean, adagio,  
udaberriak Berlin  
elurtzen duen moduan.



---

# PERBERTSITATE

Entzuidazu pantera beltza  
dantzaidazu umore apurra  
utzidazu irribarre hori  
une batez  
larruazal jainkotiarra  
ugaztun soinean  
arriskutsuki ahazten duena  
isiltasunean ahazten duelako  
mugen jatorria

erotismo eza da  
soberaniazko beldurra.

O, perbertsitate  
alai eta herrikoia,  
non sartu zara?

Hitz ematen dugu  
ez dugula jakingo  
nola sortu zen  
zure egokiarekiko gorrotoa,

sinetsiko dugu  
hitzez  
sortzetiko kontua izan zela  
botere afera  
berotasun, liskar  
eta hiltzetikoa

gaiztotasunak ekarpenik ez  
zintzotasunak etekinik ez.

O, perbertsitate  
alai eta herrikoia,  
non sartu zara?

---

# GIZA GEOGRAFIA BERRIA

inork ez dizu eskatu  
nirekin oheratzeko  
oihanaren erdian

nire melodia dastatzeko  
aski da nire erritmoari adi egon  
zure gogoari lotu eta  
autostop egitearekin  
nire bizitzaren bazterretan  
eguna norabidean

ez dizu inork eskatu  
makurtu eta  
bere topografia osoan zehar  
melatzeko  
nire arima

desegokia  
dirdiraka  
zure begi ninian

itxaronaldia ailegatu aurretik  
sinfonia apokaliptikoen  
parranda indiskriminatu hau  
amaitu baino lehen  
tempo bako tonuz  
metrorik gabeko erritmoz  
beztitu zara eta  
ez dizu inork deus eskatu  
baina giza  
geografia  
berri batean  
barneratu zara  
  
miazka iezadazu arima

---

# KALAMASTRA

**K**olonizatua daukat imajinazioa  
baina bakezaleek ez naute oraindik  
herritartasun lirikoaren fase berrira  
miseria normalizatuko egungo estilora  
girotu

kalamastra dut larritasuna  
sukarrez argindarrez eta mudantzan  
baina lekuz aldatu gabe,  
erlaxa dezaket  
ispilura begiratzuz  
          eternalki organiko  
          eta ilusiorik gabe  
pozez putz egin eta  
kaiku mozoloak izan ezik  
mundu osoa desagertzen denean bezala

glaziar bat ere badaukat  
adimena bezain kolonizatua  
milaka urte eta gero  
niregain urtzea erabaki duena,

zoriontasun apur batengatik  
errealitate guztia prostituitzen dizu  
eta inozentzia du izena

---

# INTENTZIOA

**N**ola nahi duzu  
perpausik gabeko  
edertasun sekretua  
bizitza bakar batetik  
uler zaitzadan

---

# NIRE KREATZAILEARI

h  
ostokentzen hasi naiz eta  
kezkak hartu zaitu  
zer izango ote naizen  
gaur  
izango ote naizen

agian jaioko naiz  
langabetu  
lehendakari  
jubilatatu

akaso heldu jaioko naiz  
eta ez dut distantzia egokiz  
hausnartzeko  
zure faboreen beharrik

akaso ilehori eta azeri sortuko naiz  
zorrotz eta oharkabe bizirauteko  
familiaren itzulera europar honetan



agian peoi jaio  
eta xake bat egingo dizut  
zure bizitza  
zure ondorengotzatik  
banantzen duen  
baldosinaren erdian

ausaz lelokeriazko une  
sortuko naiz  
amarrarik  
koiunturarik  
umorerik gabe

akaso ilargi-ulu orraztu batez  
betirako toreatuko zaitut  
gaur otso jaiotzean

edo maita zaitzaket agian  
instintu eskaseko piztia honen  
tratua egokitzen baduzu  
ez daukat dibinitaterik  
pittin bat ausaz  
marikoi iragangaitz eta

kobra hausnarkarien artean  
jarraitzeko desio sutsu horren atzean  
ostendua

putz egin hosto guztiei  
banaizela dirudi

---

# MUSEOA

Goya Akelarrean  
mozkortuak eta  
zorigaitzak beren poztasunean  
ez arraitasunik  
ez elkartasun uzkuritu baten  
zantzurik  
piztia kirastuak besterik ez gara  
zaratatsuak korrokadunak  
eta planeatzen dugularik  
suntsitzeko baino ez da.

Saturnok ez du deus jakin nahi  
ugaztun berritsuez  
bere ile gris harrotuarekin  
irensten du etorkizuna  
jabegozko foneman  
oraina (koskorra eta desarmatua)  
torturatuko du

eta orainak ere sakrifikatuko du  
(zibilizazioa da)

ahulena eta babesgabeena  
babesgabetasunik eta ahuleziarik  
gabeko  
etorkizun baten izenean.

Piztiakeria erretratuak  
mina argiaren eta kolonizazioaren  
irazkinaz  
puruak bilatu trafikanteak aurkitu  
pintura anglosaxoia eta  
industria bankari pelotoia  
beste botere mozkorraldi bat  
Apolo delako baten atzealdera itsatsia  
ipurdi hilezkor on bat  
jainkoak boterea usatu  
dezaketen lekuetan bakarrik  
kokatzen baitira  
diote  
Herkules seinalatuz  
marmol bihotz  
aurpegiarekin  
Egeo itsasoari eutsiz  
soinean ageri duela  
betiereko erronka hilkorra

trafikoak eta Nikek arindua  
hankutsik eta militarra  
ibiltzen du Omonia  
areto amaieraraino  
mila soldadu  
Zeusen aldareko  
gudurako bertan zain dituela.

Simetria eta harmonia klasikoa  
egungo hondamendiaren aurka  
arrakala asmatuak  
biziro kokatuak edozein kaosetan  
arte gisa eskainia  
MTV banderatzozko  
txango jendetsuei  
azenario krema zarrastada  
eta Albaceteko zutabe dorikoei.

Inperioen bidegurutzea da  
boterearen  
edertasunaren eta minaren  
elkargunea  
sarkasmoaren  
argiaren eta  
ergeltasunarena.

---

# ISILTASUN

Zure hatzen akoplamendua  
nire gogoan kuttunki  
bilatuz harridura.

Hitzak gorpu jaiotzean  
sarraskiak partikularrak direnean

ninika batetik erailtzen zaituen  
laztan anker hori  
eta  
batzuen zakurki maitatzeko  
era.

Hiltzen zarenean  
inoiz eduki ez zenuena galtzean

odoluste putzantu hori  
alegia munduari muzin

kaleen abordatzea  
iluntasunean

intimitatearen  
ilundegietan  
dena desagertzen den gunean  
ekintasuna ezik  
geriza bakoitzean urgabetua  
lantua  
bete ezin diren desioen tilet  
bilakatzen delarik

isiltasun gau  
ez duena galdegin  
berrikusi duena

isiltasuna  
umiliazio bakoitzak  
dakarrena

zeruak eta umorea deskubritzean  
esku berriak ezbai zaharretan  
beste erritmo bat nire etzanguan.

Zure sentsualitatea nahi dut  
omisio belo artean  
atzamarkada arinen

basatasun eutsia  
diskrezioz armatua  
labainduz  
beztituz  
nire gorputza  
zurean.



---

# NON ZAUDE

Non dago  
dantza inizatiko hura  
koktel eta pelotazo artean  
zure Morgan esmokinarekin  
zure zigarro zuriarekin  
zure zuhur bibotearekin.

Non dago  
militantziaz  
labezomorroz  
eta hezetasunez  
betetako etxe hura zaintzen zuen  
sentikortasun  
insolbente hura

gau eta egun  
nik 15  
zu pobre  
Donostia aberats.  
Lola estás Loca, Plarena.

Non daude  
uhinek eta zure  
insultatzeko moduak  
ofenditutako  
paseo  
beti berri  
betirako eten haren  
intimitate boraskadunak,  
zure aterki beltza  
zure egunkari euritsua  
eta nire eskua  
zure eskuaren aurka  
urduri borrokan.

Non zaude Tomas.

Non dago  
gau eta egun  
galmenaz  
isilik  
mendekatzen zen  
zure begiradan gordetako  
malenkonia

ni bideratua  
zu pobre  
Donostia aberats.

Non dago  
algara tinko hori  
militantziaz  
labezomorroz  
eta hezetasunez  
betetako herri hau ernaltzen.

Non daude  
pentsatzen ikasi nuen  
tugurio haiek

non erresistentzia  
bizitzeko modu apasionatua den,  
eta maitatzen jakitea  
ez den maitatzea.

Non zaude Tomas.